

四庫全書

史部

欽定四庫全書

欽定八旗通志卷六十六

土田志五

土田規制

奉天規制

國初創業東土扈從將士按旗分處各有定界繼因
歸附益衆糧不足支展邊開墾移兩黃旗於鐵嶺
兩白旗於安平兩紅旗於石城其兩藍旗所分張

義站靖遠堡地瘠以大城地與之

順治元年定諸王貝勒貝子公等准於錦州各設莊一所其額外各莊令其退出

又定差往蓋州收稅領催給園地十晌

又定分撥地畝緣邊次第挨給若不論疆界挑選膏腴徇情派撥者佐領領催分別罰責

又定錦州蓋州各官莊屯非奉

欽賜者概令退出

又定自京城來人員曾將伊原給地繳部者准給熟地未繳者給草萊地五晌若有餘丁者著該管官具結給與草萊地

五年題准沙河所以外錦州以內八旗官負家丁每名撥給地六晌

又題准官員莊屯兩黃旗設於沙河所兩白旗設於寧遠州兩紅旗設於塔山兩藍旗設於錦州

八年覆准山海關外荒地甚多有願出關墾地者

令山海道造冊報部分地居住

十二年題准遼陽鐵嶺至山海關另設邊界八旗
莊地多有在邊外者相沿已久不必遷移今照舊
種住惟酌量邊界開門勿悞耕穫

康熙十二年題准凡欲往

盛京領地設莊護墳者若將在京所受壯丁地退出

准撥給

盛京熟地不願退出者撥給荒地

十九年八月戶部郎中鄂齊禮踏勘

盛京滿洲新開蒿地奏言東至撫順西至山海關南至蓋州北至開原計田萬頃有奇徵收錢糧約僅有萬兩據將軍言若將滿洲自開地畝盡撤入官恐難度日

上是之

又戶部議准

盛京未墾荒地荒田一百五十四萬七千六百餘晌

內除

皇莊喂馬打草地二萬二千四百餘晌仍有一百五十二萬五千二百餘晌應將此地畝註冊有民願開墾者州縣申報府尹給地耕種徵糧若旗人有願墾者亦將人名地數呈明註冊若自京城移往官兵人等有將在京地畝退還願領

盛京地畝者將彼處旗人墾出餘地并未墾荒地酌量撥給得

昔盛京田地關係旗丁民人生計最為緊要著爾部賢能
司官二員前往會同奉天將軍副都統侍郎等及府尹
將各處田地清丈明白務令旗民咸利設立邊界永安
生業

又覆准奉天新來之民界內安插緣由次第墾種
其原在旗界內居民有願移於民界內墾種者有
仍願在旗界內墾種原地者聽從其便至旗人民
人力不能開墾荒甸又復霸佔者嚴查治罪

二十四年四月

諭大學士明珠曩者每一夫田撤還一晌之田近日丈量各旗有察出溢額之田今茲撥給何以不給此等田而以百姓開墾之田四百頃撥給耶其令戶部堂官察溢額之田現有若干及以百姓開墾之田因何撥給詢問明白同戶部堂官面奏

二十五年題准錦州鳳凰城等八處荒地分撥旗丁民丁給牛屯墾每十六丁內二丁承種餘十四

丁助給口糧農器

又題准黑龍江默爾根地方戶部各差官一員監
看耕種默爾根令索倫達呼爾官兵耕種黑龍江
令

盛京官兵耕種

又題准鳳凰城等八處差大臣三員司官八員前
往會同

盛京將軍戶部侍郎酌量屯墾

是年十二月

諭大學士等曰者遣部員自吉林烏喇至黑龍江以蒙古錫伯達呼爾索倫等人力耕種田穀大獲夫民食所關至重來歲仍遣前種田官員以蒙古錫伯達呼爾索倫等人力耕種卽中博奇所監種田地較諸處收穫為多足供蹕站人役之口糧又積貯其餘穀博奇効力視衆為優其令註冊此遣去諸員可互易其地監視耕種博奇又復大獲則議叙之

二十六年十月

諭大學士等黑龍江官兵口糧關係至重屢次轉運米數
並黑龍江默爾根地方所種米數宜加察明盛京等處
運米為久遠裨益之計當周詳區畫又發遣彼處遊手
無事之人甚多其口糧作何酌給前至黑龍江一帶乃
徑直通衢往來轉輸斷不致稍有阻滯如蔡毓榮等巨
富之人并殷實之家槩予口糧殊覺未當彼處漢軍皆
著察出披甲當差遊手無事之人可分設官莊廣開田

畝以為恒產令戶兵二部賢能司員迅往逐一察明確
議具奏

二十八年

諭奉天等處旗民田地所立界限不明著將各部賢能司
官具題差往會同盛京戶部侍郎及該府尹將旗民田
地並牧廠逐一確查各立界限詳定具奏

戶部郎中鄭都等疏言臣等遵

旨會同

盛京戶部奉天府府尹親往各屬地方詳察旗民地畝分立界限嗣後不許旗人民人互相墾種以滋爭端如有荒地餘多旗民情願墾種者將地名畝數具呈

盛京戶部在各界內聽部丈給庶界地分明旗民各安生業不致互相爭告

詔從之

二十九年黑龍江將軍薩布素疏言默爾根居住

之總管索倫安諸祐等每年耕種官田二千餘晌
令官兵移駐默爾根請即以此項成熟之田分給
耕種

詔從之

三十二年議准

盛京旗人所種地畝每年地一晌徵豆一關東升草
一束令將地畝丈量不論何屬之人俱照八旗十
三城所管地界交與協領城守尉等催追

三十七年

諭著停止差往種地嗣後不必具題如差往種地再行頒諭
三十九年題准旗人所種地畝交該管官員催追
五十五年覆准旗人開墾地畝令該管官員出具
保結呈報

盛京戶部其民人開墾地畝仍在地方官處具呈轉
報

盛京戶部准其開墾將墾過地畝於年底彙冊報戶

部查核

雍正二年議准

盛京旗人所種地畝仍照舊例在河界內種地即將
彼界協領城守尉為督催之員佐領防禦驍騎校
為經催之員如有抗欠不交者該督催官員即行
拘拏治罪如有催追不完之數計分數題叅

四年議准

盛京旗地自康熙三十二年輸草豆以來未經查丈

檔冊舛錯旗民彼此爭告經年不絕將王以下至閒散宗室

盛京所有莊屯內管領莊頭壯丁捕牲人等名姓居住村莊查明係何王府及何閒散宗室之人行文八旗分別造冊送奉天將軍

盛京戶部以備查丈地畝之大臣會同核對仍將查丈過地畝若干輸納草豆若干造冊具題查核又覆准

盛京地畝令奉天將軍府戶部侍郎會同差往丈量地畝大臣將十四城界內分為十四分旗地民地公同派出賢能官員會同查丈其

皇莊捕牲人

三陵內佐領官兵屯莊執事人閒散人等千丁驛站臺上園丁戶禮工三部屯莊官丁僧道各項人等地畝率領伊等該管官公同查丈務期詳悉清楚無致遺漏隱匿丈完之日將丈過地畝數目造冊送部

倘有隱匿不清之處日後發覺將查丈官從重治罪

又覆准寧古塔船廠等處設立州縣打牲烏喇離船廠甚近著船廠知州兼轄管理其拉林河等處地畝不准開墾交與白都訥新設知縣嚴行禁止又覆准船廠等處開墾地畝禁止旗民互相典買又覆准赫爾素等驛站各邊地之驛站所有近城之公旗莊屯寧古塔所有之開熟田地亦如奉天

府屬之州縣照每畝三分錢糧例交納若有附於原主名下未經查出者佃戶首報該縣給與印票即令其交納錢糧不許原主侵佔

十一年題准喜峯口駐防兵丁一百名將鐵門關外大屯官地分給每名給地一頃十有五畝七分有奇菜園四分有奇令其耕種照民例分別科則按畝輸租租銀留充兵餉

乾隆二年覆准黑龍江湖蘭地方設立官莊令

盛京將軍於八旗開戶人內選能種地壯丁四百名
挈帶家口前往開墾每壯丁一名撥給地六十畝
蓋給草房二間每十丁合編一莊共設官莊四十
所每十莊設領催一名共設領催四名管理由
盛京遷移家口每丁給碾磨銀五兩其家口每人給
整備行裝銀二兩沿途各給口糧撥驛站車輛送
至吉林由吉林撥運糧船仍給口糧送至湖蘭初至湖蘭
每丁給冬夏衣帽其家大口每月給糧二斗四升

九合小口半之每開墾地六畝給籽種二斗每莊
給牛六頭如有倒斃動支庫貯牛價銀買補再湖
蘭安駐兵丁各有墾種地畝不能代官莊人等助
墾於每莊額給牛六頭外各多給牛二頭令全出
已力墾種此牛如有倒斃無庸補給每牛一頭月
給牛料糧一石二斗其家口糧給一年牛料糧給
兩月皆停止每丁所受之地歲納粗細糧三十石
第一年免輸第二年交半第三年全納再委撥官

兵採木造屋每間各給四兩飯銀動支庫銀倉糧
令該將軍等分晰歸款奏銷竣安設官莊事竣令
盛京將軍於八旗開戶人內再察有願往湖蘭墾種
官地之人應增設官莊若干再議具奏

六年議准湖蘭地方寬衍可設官莊之處尚多應
將前設四十官莊內閒丁一百三十八名選擇五
十名增設官莊五所撥地開墾每名給地六十畝
及牛種器具口糧並每年應納糧數均照二年之

例但選撥官莊閒丁不比他處移住其每丁應給房二間每間給銀四兩五錢令其自行蓋造無庸別撥兵丁其餘丁備補各莊空闕

七年議准湖蘭左近溫德亨山並都爾圖地方土性肥饒水草佳美應將

盛京將軍所送願墾官地開戶人內選能種地壯丁五十名增設官莊五所撥地開墾其資送及撥給田房牛種器具衣帽口糧並應納糧數均照二年

之例再六年增設官莊五所合之此次所增官莊
五所已足十莊之數亦照例增設領催一名管理
九年二月議政大臣和碩裕親王廣祿等議得副
都統巴寧阿所奏開墾拉林地畝移駐滿洲一事
以今年出派本處人丁一千五百名盡力開墾得
地七百五十一頃二十一畝將此地即令原派一
千五百人耕種明年再添派人丁六百名開墾又
可得地三百頃二年所得共一千五十餘頃給與

移駐一千戶滿洲均分每戶得地一頃有餘再者
修造房屋衙署雜事甚繁只前所派人丁六百名
不足供役請添派六百名給與鹽菜銀兩及採辦
牛隻犁鏵各費用即於吉林庫存項下動支仍令
盛京戶部照數歸款如此則一千戶滿洲地畝房屋
可以按期完成等語查臣等議政處原議一千戶
滿洲每名給地三頃後經侍郎三和具奏二年內
只能開墾一千六七百頃臣等續議且以二年內

所墾均給外其餘隨其力量遞年補墾足額咨行
在案嗣於乾隆八年九月奉

旨前據將軍鄂彌達等赴拉林阿爾楚喀踏勘地方將
應撥給移駐一千名滿洲之地派本處官兵令第一
年開墾一千二百頃次年開墾五百頃于甲子年秋
間遣去駐劄等因具奏迄今一載所墾地畝不敷原
奏數目只開墾七百餘頃此皆鄂彌達並不以事為
事之所致也鄂彌達著交部察議其未墾地畝著交

新任將軍博第務照原奏數目開墾如其難得量其所得若干預報該部將派往之人合地畝數目先行撥往欽此欽遵亦在案巴靈阿博第自應遵

旨辦理今尚未辦遽議添派六百名開墾與原降

諭旨不符巴寧阿所奏均無庸議請交該將軍博第將原派人丁一千五百名內儘力通融耕種熟地仍將去年開墾未完地二百五十頃補墾足額所有已墾之七百五十餘頃著八旗先派七百五十人

前往其未墾之二百五十頃俟墾足後仍派二百五十戶續行遣往以足一千之數奉

旨依議

二十年十月大學士忠勇公傅恒等議覆將軍傅森奏稱今年海溝耕種開墾地五百頃出長穀苗尚屬茂盛因雨水過裕稍缺曝晾其收割登場者僅得粟米一千六百七十石稗米五十石蕎麥八百三十石俱收入新倉存貯再修理副都統衙署

三十六間五百戶滿洲住房二千五百間現已完
八屯共掘井三十二眼查乾隆九年移駐滿洲一
千戶每口每日給米八合三勺今所移五百戶自
伊等到時起至秋收時止應給八個月口糧所收
新墾穀石不敷給與請于拉林存倉穀內動支等
語臣等去年會議將拉林阿爾楚喀地方盡數籌
畫可揀選滿洲三千名分為六起遣往今此項遣
往兵丁自丙子年起程應行給與銀兩房間地畝

俱照前次一千名滿洲之例辦理奉

上旨依議

二十一年十一月兵部具奏據吉林將軍覺羅額勒登咨稱拉林所管瓦琿地方修蓋房屋備第一起五百戶滿洲居住茲已完竣具本年收成穀石亦已報部請于丁丑年春季地未泛漿之前遣第二起前往方可不悞耕種

二十二年十一月兵部具奏據吉林署將軍傅森

咨稱今年西溝地方蓋造第三起五百戶滿洲房
間完竣請于戊寅年春季地未泛漿之前遣往

二十三年十一月兵部具奏據吉林將軍薩拉善
咨稱今年霍濟墨地方蓋造第四起五百戶滿洲
房間完竣請于己卯年春季地未泛漿之前遣往
皆奉

旨依議

二十四年十月奉

上諭內務府議駁得祿奏請莊頭應交米石折銀一案
辦理甚屬錯謬盛京莊頭應交米石在本處尚有准
其折銀交納之例而錦州相隔三百餘里反不准其
折銀交納情理俱為倒置此案于本年正月奉旨交
議直延至九月底具奏即有移查何至延緩若是所
有會計司承辦之員著降二等調用其餘同司各員
俱著罰俸二年內務府總管及堂郎中俱著罰俸一
年

二十七年三月山海關副都統富黨阿奏言山海

關駐防原有官員養贍地一萬二千四百八十餘

畝

原奏作一千七百八十晌

此內官員及寡婦等所應得數目

並未分別查辦又有菜園田畝亦未丈量查官員

等應得地數統算不及六千畝

原奏作千晌

其間餘剩

甚多請將此項餘地一體查丈除應給者照數給

與外其餘出之地酌辦養贍鰥寡孤獨之戶奉

旨依議富黨阿此奏甚是但富黨阿如此陳奏彼處官

員必歸怨于伊未必實心遵奉著戶部派賢能司官
一員前往山海關協同富黨阿妥協辦理

五月戶部派員往山海關會同副都統查丈事竣
奏稱山海關原給官員地畝曾經侍郎塞爾赫丈
量造冊中有官兵墳墓之地及伊等祖上原得之
地康熙三十五年收地冊內並予開除今臣部委
員查丈既核與原冊相符其伊等墳地及祖上原
得地均應准其開除

又奏山海關舊設駐防協領等二十一員俱給有
養贍地畝惟副都統一員及佐領八員乃乾隆八
年添設並未議給地畝其每年所食俸米係採買
供支造入兵馬冊內報銷在案今據該處丈出地
畝除照舊仍給官員及養贍孤寡尚多贏餘請將
副都統一員佐領八員亦依原設官員之例給與
地畝其應領俸米請自次年春季起一體裁汰庶
帑項稍可節省而官員亦受其益

又奏查定例各處駐防官員之寡妻有情願守節者准給期年半俸銀米今山海關駐防官員寡妻因無期年半俸銀米向俱照伊夫原得地數辦給整分未免過優嗣後請減半給與仍俟孀婦物故或緣事回旗即將前項地畝撤回備用報部查核又奏關外地畝較關內之地有間今官員應得地畝若不將一年租穀按照俸米計算恐於官員無益應請揀選上地准照伊等俸米之數仍以六畝

為一晌副都統給與一百晌協領七十晌佐領六

十晌防禦五十晌驍騎校筆帖式各四十晌

謹案此處

晌數未便更改緣前文有六畝為晌句

其各官所得地畝應納錢糧

仍照舊在

盛京寧遠州旗倉交納

又奏官員地畝應以上則給予所剩中則下則地足為養贍官員寡妻及鰥寡孤獨人等之用但官員之寡妻可以給與地畝其鰥寡孤獨人等若亦

給與地畝恐伊等不能辦理適為無益請派賢能
官二員會同地方官按地肥瘠酌定租數收租後
仍隨時價變銀存公照熱河地方養贍鰥寡之例
每月給與錢糧銀一兩五錢俟孤子成立挑補披
甲即將養贍銀裁汰此係

聖主格外恩施與別項地畝不同且餘出之地向既不
納錢糧應免其報陞科則其每年用過餘剩各數
亦照熱河之例咨行正藍三旗核銷以清公項

又奏查康熙二十七年將山海關城守尉佐領移駐

盛京所有官員菜園地五頃一十畝經戶部收存至康熙二十九年派往山海關駐防之總管防禦等以本身地畝呈部請換遂以五頃一十畝之菜園給予後因歷任移換閱年已久協領防禦等官有換得者有本身無地而與原任子孫同分地租者有原任子孫仍照舊收佔者有曾經埋葬祖墳者

伏思此項地畝既經查明丈過除墓墳之區仍留
給本員子孫外其餘官地請依照各官品級給與
副都統六十畝協領二員各四十畝佐領八員各
三十畝防禦八員各二十畝另於各官養贍地內
按數劃出以抵還原交本身地畝之人其有餘剩
則以充公為養贍孤寡之用俱奉

上旨依議

三十一年三月奉

上諭戶部議覆侍郎英廉奏請丈出盛京旗民餘地准
令無地兵丁閒散人等認買一摺原為旗人生計起
見但此等無地人戶貧富不齊其有餘者置產必多
而無力之家未必能一力承買恐於伊等資計仍無
實濟因念該處冬圍兵丁一切鞍馬之資不無拮据
若將此項餘地內酌派徵租每年賞備資裝於該兵
丁殊有裨益其應撥用若干及所餘地畝尚多或可
一體徵租存貯動撥或聽旗人認買毋致有名無實

之處新柱現在出差盛京著會同將軍府尹確勘實在情形妥協定議具奏

是年四月尚書新柱等奏稱奉天旗人原賴種地為生惟是其中貧富難齊在有餘之家凡遇可置之產無不設法購覓而無力之家或專藉糧餉以供養贍或耕數畝以資糊口日給尚屬拮据何能出資置產若將丈出餘地准令無地兵丁認買即使官為辦理極其嚴密而詭計影射以及私典偷

買等弊斷難悉除是地畝終歸有力之家而無地
旗丁勢必不能一力承買誠屬有名無寔至於冬
圍兵丁係輸派撥數年方值一次即有些微添
置實亦分所當然但一切鞍馬行裝無一不須製
備若所費稍多未免即至拮据廼蒙

聖主俯念兵艱恩施格外復為籌款賞給俾得辦理有
資則其於生計自必漸次寬裕臣等通盤酌計原
丈餘地四十一萬八百餘晌加之移駐塔爾巴哈

台兵一千名隨缺地七千晌二共地四十一萬七千八百餘晌內除應撥隨缺官員地一萬六千九百晌令具照例納糧兵丁地四萬八千五百七响水冲沙壓學田水手公產等項地三萬九千九百餘晌其餘地畝共三十一萬二千四百晌有奇

謹案

六畝為一晌然此處晌數俱仍來文未便以畝數核改蓋其奇零之餘數與開除之細目非按地確查未由懸斷故只就原奏開載期於傳信無訛一併入官但各該戶數載

經營一旦撤出未免有妨生計請即令原種人等

按數認種或有轉租於人者聽其自便應輸租銀
仍於該戶名下催追不許稍有諉却如有事故情
願更替許其呈明本旗方准退領倘有拖欠租銀
以及寔係無力承種之戶俱由各該旗查明撤出
另行召種仍將徵租地畝花戶姓名原認地數四
至造具紅冊四分分送戶部及

盛京戶部將軍府尹各衙門存查其各處地畝高下
肥瘠不同租價難以畫一必須分別等差方可永

遠遵照查錦州義州寧遠熊岳蓋州復州金州等
七城地土高阜人烟湊集應請作為上等

盛京廣寧牛莊海城遼陽等五城地雖窪阜不一尚
屬平坦應請定為中等岫巖鳳凰城

興京開原鐵嶺等五城或臨近海濱地多斥鹵或山
多沙石半屬荒磧應請定為下等其上等地畝上
則每晌酌擬租銀四錢八分中則四錢二分下則
三錢六分折中每晌銀四錢二分中等地畝上則

每晌酌擬租銀四錢二分中則三錢六分下則三錢折中每晌銀三錢六分下等地畝上則每晌酌擬租銀三錢六分中則三錢下則二錢四折中每晌銀三錢酌計每年共徵租銀十一萬二千四百兩有奇令承種地戶各按地畝之高下分別輸納每年派撥冬圍兵丁一千三百名每名應需恩賞銀十五兩共需銀一萬九千五百兩應請卽在此項租銀內撥給其餘銀兩解交

盛京戶部存貯撥用應徵租銀請責成各該處城守尉協領暨地方州縣照例分限督催動存各數由盛京戶部按年另冊報銷其承催督催各官照例一體考察以專責成再奉天地方錢多銀少此項餘地租銀應請銀錢兼收以免易銀易錢之累每銀一兩合大制錢一千文免其徵耗冬圍兵丁

恩賞即於所收錢文內撥給如有餘剩錢文照搭放兵餉例辦理經戶部議准奉

旨依議

三十四年二月大學士劉統勲等遵

旨將戶部議覆侍郎瓦爾達條奏旗地原摺交將軍恒
祿侍郎瓦爾達閱看並令將該處情形逐一講論
據瓦爾達稱從前條奏此事原以該處旗人生計
艱難出典之地力難回贖計惟改典作租分別年
限給還原業主庶旗產不致轉為民業今閱戶部
覆奏民人因違例而撤地歸主固所以示儆而同

一違例出典之旗人不須歸價即可得地是因違例而轉得便宜於情理似未允協等語所議寔屬持平無可再議惟查

盛京出典地畝較近京旗地不同該處旗民交易均屬白契所開價值或係零星湊算或以什物准折甚至隨意虛開皆所不免若照近京旗地之例依典價按年遞減恐原契不無浮冒難以盡憑至向例近京旗地官贖以後仍准原業主五限交銀或

指扣俸餉自行回贖今查該處旗人生計尤為淡薄向例五年之限為期稍迫恐不及按限扣還應請酌寬等語伏思該處旗民交易向來既惟用白契其原價自不足憑查戶部從前辦理入官地畝皆係按租定價即回贖近京旗地有契價較時值過重者亦係體察租數據時核減歷經遵辦在案臣等公同酌議請將此項民典旗地無論年分遠近契價多寡總以現在租息為斷如核計租銀可

得一錢者量給價銀一兩均就租息之重輕定價
銀之多寡自可杜浮冒之弊先令地方官查照段
落履勘核實造冊呈報戶部恭候

欽派大臣前往會同該將軍侍郎府尹覆勘定奪至該
侍郎所稱官贖之後旗人扣價還官請照向例酌
寬年限之處亦係為旗人生計起見查從前京師
官贖旗地准令原業主扣俸交銀俱係定限五年
今此項回贖地價可否准令十年扣交俾生計益

為寬裕出自

皇上天恩奉

旨依議

三十七年十二月將軍增海奏言

盛京本城各佐領下馬甲計前鋒二百名領催五百二十八名馬兵四千八百六十八名共五千五百九十六名分於六十六佐領每佐領有七十餘名者八十餘名者九十餘名者額數多寡不一滿洲

蒙古有前鋒漢軍火器營無前鋒皆一體當差其中傳事聽差看守城門衙門倉庫等俱係輪流行走一月差竣仍得兩月寬閒曾經

皇上賞賚每人隨缺地六十畝以充生計至於額設步兵八百名其中食一兩五錢之領催八十名食一兩之步兵七百二十名而每佐領下領催或一名或二名或並無領催其步兵或三名五名或十五名二十名數既參差其所當差務計近城十六

堆用兵一百六十名邊門八堆用兵六十名八旗
二十四堆用兵一百九十二名又緝盜巡更查街
及傳事聽差等用兵一百四十餘名計每日必須步
兵五百五六十名原額八百名內作兩班輪流寔
不敷用甚至有兼倍差遣者臣等細心籌畫請將
六十六佐領下馬兵不論原額七十名八十名九
十名截長補短皆以八十名為斷計共五千二百
八十名作為定額其餘三百十六名遇缺陸續裁

汰此項裁汰馬甲補為步營領催五十二名步兵
三百三十六名共三百八十八名合原數八百名
共成一千一百八十八名每佐領下定為步營領
催二名步兵十六名如此籌畫均勻則

盛京世僕俱荷

皇上恩膏差務均平閒暇時亦可以謀生理矣其裁汰
之三百十六名馬甲每年所餘錢糧除應給現增
三百八十八名步兵錢糧四千九百六十八兩外

仍餘銀二千六百十六兩入旗正項報銷其隨缺地畝亦可節省是否有當伏祈

皇上睿鑒訓示奉

上諭將軍增海奏盛京各佐領下所有馬甲多寡不等請裁馬甲添設步甲其餘剩錢糧并隨缺地畝入於正項報銷一摺經軍機大臣會同該部覆准所辦非是盛京額設馬甲並隨缺地畝皆為養贍該處滿洲而設今年久生齒日繁若將伊等應得分例裁汰入

官於伊等生計殊屬無益如現在京中八旗戶口繁
盛生計不無拮据經朕特沛恩施另賞鰥寡孤獨錢
糧以資生理其派往西安涼州莊浪寧夏兵丁俱照
所派之額在京挑補又添兵缺甚多每年多費帑金
不下數萬並無恡惜國家一切用度固應節儉然亦
只宜酌減無益糜費並查核不肖人員使不得從中
侵蝕至於正項應支之處豈可節省盛京滿洲皆朕
臣僕人丁日盛不敷養育尚宜酌量添給豈有轉將

伊等應得分例裁汰之理今各佐領下馬甲額缺不均固宜均勻辦理但此項裁缺錢糧地畝亦宜斟酌養贍多人著將裁汰之馬甲三百十六名錢糧交增海等或添設步甲或添設養育兵惟期恩施普被其隨缺地三千一百六十晌如何使衆人均有裨益之處並著增海等定議具奏

三十八年正月增海奏應裁三百十六缺之馬甲若添作步營領催五十二名步甲三百三十六名

合原有之八百名輪流差遣則無庸重叠出派而更替有人伊等當差與生計俱不至貽悞應請仍照前奏辦理其裁缺所贖之銀兩除新添步營應給四千九百六十八兩外仍餘二千六百十六兩養贍鰥寡孤獨計每月可給養育兵四百三十六名請於

盛京本城舊滿洲八佐領漢軍二十四佐領每佐領各給八名舊蒙古八佐領每佐領各給六名新滿

洲二十三佐領內除二佐領各給六名外其餘二十一佐領及巴爾呼蒙古三佐領共二十四佐領每佐領各給五名再查得六十六佐領馬甲隨缺地畝俱在各城邊境相隔甚遠該兵丁不能耕種惟取租價每年秋收後由佐領派領催收取分給兵丁在案而此步兵等並無隨缺地畝夜間坐更巡邏等差亦屬辛苦仰懇

天恩將所裁馬甲地租銀每年賞給步兵為冬間買置

皮衣之用則各步兵等禦寒有賴皆永霑

皇上厚恩於無既矣奏入

命戶部議行

是年八月奉

上諭上年奉天查贖旗地一事經裘曰修會同履勘後
交瓦爾達詳加查核今半年餘尚未見查辦完竣已
降旨將瓦爾達革職所有查辦旗地未完事件著交
喀勒崇義會同將軍府尹即速悉心確查妥辦

是月裘曰修瓦爾達奏

盛京民典旗地經該將軍等查明候贖地十二萬餘

晌

謹按此處晌數未便以畝數更改蓋原奏不著奇零若干無從核算故仍其舊咨部動

帑回贖奉

旨派出臣裘曰修瓦爾達會同覆勘臣等至

盛京調取戶部等衙門底冊赴各城詳加體察並無

旗人妄指民業為旗產亦無民人捐不聽贖等情

原報地數租價並取具各該旗及地方官結狀前

來臣等復回至

盛京會同臣增海等悉心籌畫其一切原查贖報動
帑徵租指扣俸餉各條欵均照戶部原議辦理查
此項地畝蒙

皇上天恩動帑回贖俾出典旗人不失舊業受典民人
照舊得價

聖恩高厚至優極渥臣等公同酌議自贖之後原業旗
人能自耕種准其撤回自種原佃民人偶有拖欠

地租令地方官代為催追倘仍抗不給租方許撤地另行招佃如原業旗人不能自種而原佃民人又不欠租遽將地畝撤出另行招佃者察出照律治罪以示懲儆使旗民相安以仰副

聖主一視同仁之至意奉

旨所奏是依議

四十一年四月將軍宏晌奏言

盛京各城旗倉米石每年二三月間除定額應存數

目外將多餘米石照市值減價糶給兵丁坐扣餉銀原因倉米不能久貯又恐青黃不接之時兵丁食用維艱是以籌畫通融期於倉貯兵丁均有裨益惟是所糶米石皆係挨年陳米官斗又小於市斗雖經減價核與兵丁買用市米無甚區別而按季坐扣所剩餉銀無多一切當差需用仍屬拮据自應稍為變通以收實效查

盛京各城額設馬兵一萬五千六百五十九名錦州

義州二城額設步兵三百八十八名荷蒙

天恩馬兵每名賞有隨缺地六十畝步兵每名賞有隨
缺地三十畝俾其耕種食用但前項隨缺地畝係
由各城零星荒甸及丈出餘地內撥給相離寫遠
者多兵丁不能親身耕種均係佃種收租每地六
畝不過收制錢三百文而往返取租盤纏之外所
剩無幾是雖有隨缺地畝未能均沾實惠臣等詳
悉籌畫請將兵丁隨缺地畝交各城地方官依上

中下則照數徵租報部其兵丁應得隨缺地租改折米石即以每年出糶之米給領以地六畝銀三錢之數計算馬兵一名每年可得租銀三兩步兵一名每年可得租銀一兩五錢照依歷年出糶自五錢至一兩價銀數目折中酌定每米一石作價七錢五分每馬兵一名給米四石步兵一名給米二石如此通融辦理倉米既可無庸出糶而兵丁得此米石生計自為寬裕詳查

盛京各城旗倉每年應徵米四萬九千二百石零除
各項需用外每年實餘米三萬四千一百餘石馬
兵步兵二項共需米六萬三千四百一十二石除
餘米三萬四千餘石尚不敷米二萬九千餘石查
奉天府屬各州縣倉每年例有出陳易新糶借米
石所有不敷兵米請即就近動用民倉發給仍照
直省採買不敷兵米之例飭令各州縣分別定價
照數買補還項所需銀兩即在所徵隨缺地租銀

內動用如此一轉移間於旗民各倉額貯無虧所
徵地租即以下則地每六畝三錢核計一年可得
租銀四萬七千五百餘兩其中上等者銀數更多
以之抵補旗倉糴米價值及買補民倉動用米石
俱屬有贏無絀而兵丁得以永遠均霑實惠與
國課倉儲兵丁生計洵屬有益是否有當伏乞

皇上睿鑒訓示奉

旨該部議奏

五月戶部議奏乾隆十三年軍機大臣會同

盛京將軍酌議兵丁隨缺地畝於現在閒空荒甸就近均勻撥給令其耕種仍交該將軍留心查訪務須抵缺交代勿使私自典賣奏准在案臣等伏思盛京各城旗兵自撥給隨缺地畝以來咸得服習農功以資養贍食用無虞缺乏而於青黃不接時復將旗倉米石減價出糶俾接濟有資仰見我

皇上軫卹旗僕有加無已之至意立法本為至善今該

將軍以前項地畝相離寫遠兵丁不能耕種收租
往返盤費尤多請將地畝撤出交縣徵租每年馬
兵折給四石步兵折給二石云云查從前分撥地
畝時原議就本城荒甸撥給如本處有餘仍分給
別城使之自行耕種本不應有相離遙遠之理今
據稱寫遠者多是當日未照原議辦理以致兵丁
不能親身耕種勢不得不變為收租而收租必至
有名無實所以該將軍有撤地撥米之奏也然其

中扞格難行處臣部不得不詳慎籌畫查

盛京各城旗倉米數除各項需用外每年只餘米三萬四千餘石今若按每兵折支四石二石之數共需米六萬三千餘石計不敷之數將及三萬勢將借動民倉殊不知民倉積貯原以備民間緩急之需一切賑卹平糶均為民食攸關倘年歲有豐歉不齊民間之需用既多旗兵之折支又例難停止左支右絀將必有掣肘之虞且歲有不收地畝錢

糧尚應蠲緩佃戶租銀更難按則徵齊則採買無資又將作何辦理况

盛京地畝按則徵租每晌三四錢不等而各屬月報糧價每一石米市值七八錢至一兩四五錢是即將地租全徵尚不敷買補則不敷之價又將何出且不敷之米幾及三萬即為年額必需採買之數設遇年景不齊市價昂湧若加價採買則租數多虧若停買緩待則兵丁又無米可支是不但無裨

兵食反恐有損民倉與其更張成規每多掣肘自
不如遵照舊例較為允協該將軍所奏應毋庸議
至隨缺地畝其中或間有遙遠之處自應就地土
之坐落量加籌換即可使遠近田畝一律均齊矣
奉

旨部駁甚是依議

又奉

上諭戶部議駁宏晌等奏盛京各城兵丁隨缺地畝請

交地方官按則徵租將所得租銀折中定價改給米石一摺所駁甚是已依議行矣各城兵丁賞給隨缺地畝俾其自為耕種以資養贍所以體恤兵丁者至為周渥宏晌等乃因其地有遠近輒欲官為徵收按價折米設或豐歉不齊採買無資又將作何籌辦該將軍等何未計及於此至從前定議時原令將現在閑空荒甸就近均勻分撥何以兵丁受撥之田悉皆寬遠是當時已辦理不善即或因地畝不能就近分

撥有斷難照辦之勢當時即應奏明另為設法乃相沿日久或欲一旦更張又不計其事之是否可行徒欲要譽衆兵而未知通盤籌畫有是理乎著傳諭宏晌將其中有無弊混之處據實奏覆

是月宏晌覆奏隨缺地畝係乾隆十三年原任將軍達爾當阿請將閒荒餘地分給兵衆每名各十晌因荒畝不足分給前後陸續每名先給七晌嗣於乾隆三十一年理藩院尚書新柱奏將丈出旗

人餘地每名補給三晌以足十晌之數而當日分撥時皆係開種所餘去城稍遠不能與當差之處附近以致每年秋季衆兵告假取租往返積日竊伏思戶部內倉及開原等外城十四倉每年除支給俸米並存倉額米外所有餘米俱推陳出新令兵丁春季認買至秋還價若將地畝官為徵租亦可抵還倉借以省取租之勞又恐米石不敷請動民倉補足並未通盤籌畫愚昧具奏請交部嚴加

議處奉

旨此次姑寬以後戒之慎之

四十六年奏准

盛京吉林等處流民私墾地畝均按則輸糧如有流
民回籍他往所遺地畝撥給旗人耕種納糧仍飭
該管官不時稽查倘此次清查後復有流民私自
開墾及旗人私行租與民人佃種者旗人民人等
一律治罪地畝入官

五十七年

盛京將軍琳寧奏請將

興京開原遼陽等城閒地撥給守

陵官兵外

詳見後卷

所餘地畝尚多查錦州各城於乾隆五十

四五十等年水灾案内勘明水冲沙壓田畝不

堪墾復例應補給八旗兵地一萬一千餘畝請撥

補兵額以收實效

從之

以上奉天規制



欽定八旗通志卷六十六

欽定四庫全書

史部

欽定八旗通志卷

六十七至六十九

欽定四庫全書

欽定八旗通志卷六十七

土田志六

土田規制

屯戶規制

謹案雍正二年以內務府餘地併八旗入官地畝於霸州等處撥旗人首

戶試行井田故舊志立井田一目乾隆元年已停止井田改為屯戶今敬遵新例標目而仍列

井田規制於前識錄起焉

雍正二年閏四月

諭曰朕交與怡親王查戶部餘地內務府衙門餘地拖欠錢糧人員所交地畝數目俱已查明具奏朕盡行覽過爾等即照此辦理但內有民地如何辦理之處爾等議明具奏再行辦理

六月怡親王等覆奏臣等查得內務府餘地共一千六百餘頃拖欠錢糧人等所交地共二千六百餘頃此二項地內挑選二百餘頃作為井田行文八旗除官員子弟現在讀書之人及有產業現可

當差並後順藩下人等外將無產業滿洲五十戶
蒙古十戶漢軍四十戶共挑選一百戶前往種地
此撥去種地之人自十六歲以上六十歲以下各
授田百畝周圍八分為私田中間百畝為公田共
力同養公田俟三年之後所種公田百畝之穀再
行徵取將革職大員內誠實有年紀者揀選二員
前往勸教管理三年之內果有成效着令議叙十
月後農事既畢令打步圍學習射箭伊等子姪內

有好者令本佐領照常挑差如果行之有效再照此例派往一次庶無產旗人各得竭力以務本業而亦可服苦矣令戶部挑選賢能司官會同該州縣將拖欠錢糧人員所交之地查明收貯仍將地之腴瘠租價之實數查明分為等次造冊報部再與種地人等歷蓋土房四百間設立村莊之處亦交與查地官員即將此項地內挑選設立算其人口分給每間給銀十兩共需銀四千兩仍將用過

銀數造冊報部俟土房蓋完之日將種地人等令其前往居住此耕種井田人每名給銀五十兩以爲一年辦買口糧牛種農具之用將此銀即交與查地官員會同管理勸教二人公同監辦若有餘剩銀兩分與伊等以備來年種地之用將用過銀兩報部查核歷蓋土房辦買農具合算共約需銀一萬四千兩此二項地內除挑選井田地畝外仍有地四千餘頃約計一年可得租銀三萬餘兩立

此井田所需銀兩將戶部銀兩支給再拖欠錢糧人等所交之地如何作價抵補拖欠錢糧之處俟查完地畝後再行議奏現在地內有典旗人地畝者有典買民人地畝者先經內務府奏稱如典旂人地畝勒限三月准其取贖如逾限即行入官辦理此內有典買民人地畝俱關係地方錢糧應交與地方官勒限三月令原業主取贖如逾限將此地交與該撫給與本地民人收取原價解交內廣

儲司等語但典賣地畝之人俱係貧窮小民勒限則不能遽得銀兩取贖請暫停勒限使民人得銀即在戶部具呈驗看原契照部原折價銀交納准其取贖未贖之前照例起租解部贖後止租再查戶部餘地俱係供應各處撥給備用之地仍令各處收贖備用如有撥給之處仍照舊撥給再作井田地畝內倘有旗民人等之地交雜其中者將就近存貯好地內照數換給如此八旗中無產業者

各得產業以全生計均沾

聖主洪恩於無既矣奉

旨所議甚好照行

三年正月又奏新城縣有地一百一十六頃零固
安縣有地一百二十五頃八十九畝零俱係拖欠
錢糧人等所交及內務府所收之地畝查固安縣
地畝坵段雖屬零星然皆附近村居且去京師甚
近甚可分給種地人等耕種請將固安縣所有一

百二十五頃八十九畝零官地以十二頃五十畝
為公田以一百頃為私田計得十二井五分其存
剩一十三頃三十九畝零為種地之人室廬場圃
處所至厯蓋土房需銀四千兩令直隸總督於雍
正二年地丁錢糧內動支交地方官即行厯蓋務
於二月內完工庶耕種不失農時一面預行挑選
種地人等俟土房報完之日即給與口糧牛種農
具等項銀兩撥往居住其管理之員俟八旗查送

到日彙齊引

見恭候

欽定奉

旨依議耕種之期已近厯蓋土房務期堅固不可草率即

速行文

二月又奏井田管理之員據八旗都統咨送原任
副都統保德等二十九員到部相應開列職名即
帶領引

見奉

旨此次著厄爾德黑連宵先去將此十人爾部記檔再派往時此內派往

五年奉

上諭旗人枷號鞭責治罪革退官兵並無恒業在京閒住倚靠親戚為生以致良善之人被累維艱而伊等無事閒游不能不生非為惡將此等之人查出令於京城附近直隸地方耕種井田作何安置之處王大臣等會議

具奏遵

旨議定將八旗滿洲蒙古內拖欠錢糧及為非犯法枷責
治罪革退官兵皆并其妻子發往井田各該旗查
明備造細冊鈐蓋印信發與管理井田之官嚴行
約束令其耕種不許出入京城伊等子孫內如有
長大誠實弓馬嫻熟欲來京披甲當差者該管官
保送來旗於挑選披甲時仍行挑選若挑選後為
非犯法者將保送之官一體治罪發往井田之人

在彼處仍行怙惡不悛妄生事端者管理井田官
即呈報該旗咨部加倍從重治罪巡察御史地方
官員亦不時稽察若不守分飲酒生事等項地方
官不申報該督或該督不咨行該地方被巡察御
史察出將州縣官並該督議處若御史不行查叅
將御史治罪再管理井田之員有事呈報各旗若
無記識難以憑信交與該旗鑄給管理井田關防
但今發往之人皆係從前已經治罪不必照先去

之人安置每戶給三十畝五戶共給牛三隻購買牛具籽粒等物及每年口糧每戶給銀十五兩交與管理井田官員於相宜地方築建土堡酌量人口多寡苦蓋土房俾其居住發往之人管理井田官員不能料理妥貼或約束不嚴致令生事擾害地方者將管理官員從重治罪嗣後每年一次查出發往再有開戶之人犯法治罪退甲閒住不無妄生事端嗣後給與發往井田人內効力良善之

人為佃丁不許擅賣令其出力

又

諭井田地方止有一人管理著於彼處再補放驍騎校四員領催八名料理事務俸餉陞轉照在京驍騎校領催一體以為彼處之人出身之路若陞轉後仍在彼處効力者即令其帶銜在彼居住此二年在彼勤慎可用應補驍騎校之人著保送到部引見補放

乾隆元年四月和碩莊親王等奏設立井田試行

十年以來所有承種之一百八十戶緣事咨回者
已有九十餘戶循環頂補大都皆不能服田力穡
之人行之未見成效但此時若盡行撤回則勤謹
者轉致失業若將不肖之戶咨回更換勢必增添
工本徒費錢糧臣等酌議應令確察實力耕種安
插得所者改為屯戶按畝完納屯糧於附近州縣
倉內收貯備用其原設之領催改為屯長約束屯
戶聽該處防禦管轄原設之驍騎校撤回該旗補

用不能力穡之戶咨回本旗停其撥補原領田房
交州縣賃耕取租解部又雍正五年將過犯革退
之旗人發往固安新城二縣每戶給地三十畝并
給牛具籽種蓋造土堡房屋令居住耕種當經各
旗發過六十二名除病故逃亡外現今只存二十
七戶此二十七戶亦應查明將實力耕種者改為
屯戶其中不肖之戶亦令咨回本旗奉

旨依議

十一月又議覆管理井田事務甘國璧等條奏屯莊七款

一井田每戶原給田一百二十五畝以十二畝五分為公田十二畝五分為室廬場圃一百畝為私田公田糧石原係盡收盡報今改為屯莊未便仍循公田舊例應交與戶部核定科則行令該州縣遵照徵收屯糧

一堡戶原止給地三十畝俾其自種自食不交公

糧今既改屯若令其按畝完糧未免拮据且現在此等戶數亦屬無多應聽其暫行照舊耕種

一三堡旗人零星居住旗民雜處難於約束稽查應將各戶原領房地交還州縣即於咨回井戶所遺房地內照數撥給

一改屯人戶嗣後身故有子者自應頂補倘遇無子寡婦情願守節並無親屬可依者留地四十畝養贍即令本屯人代種完糧俟伊身後仍將地畝

交官名種

一井田原撥霸州固安永清新城四州縣之地今
議改屯莊令防禦管轄而現在防禦止有霸州一
員固安一員應將附近霸州者令霸州防禦管轄
附近固安者令固安防禦管轄

一井田各莊向設鄉長一名專供督率農務交糧
并稽查逃盜賭博等事今改屯莊請仍留供役如
果能勤慎遇屯長缺出准其拔補

一驍騎校在外耕種多年一旦撤回未有可補之缺該員呈稱難以度日應准其暫留種地俟有缺補放之日即令回京將地畝交還州縣奉

旨依議

三年戶部覆准從前井田每戶每年交穀十二石五斗收貯縣倉今改為屯田是並無公田私田之分應照畝輸糧每畝徵屯糧一斗既不失

皇上愛養旗人之至意復與原設井田良法亦不相悖

所有霸州之狄家莊等四處共地三十六頃二十
五畝固安之蠻子營等五處共地六十四頃十一
畝零永清之喬家營等三處共地二十七頃五十
畝新城之莊西宮井二邨共地二十七頃十二畝
零以乾隆二年為始令各州縣會同防守尉於秋
收後照數徵收并照口外熱河八旗地畝之例造
入地糧冊內報部查核奉

旨依議

十一年六月奉

上諭直隸通省今年應徵地丁錢糧已加恩全行蠲免
固安霸州二防守尉所轄應徵屯糧例不在蠲免之
內但朕念耕種井田之旗戶按畝輸穀在縣交納與
民田正賦納銀者相同著將固安霸州二防守尉本
年應徵屯糧穀石一體加恩蠲免該部即行文該督
知之

十七年三月戶部議覆直隸總督方觀承疏稱霸

州固安永清新城四州縣共查出屯戶私立年限
租約三百三十五張長租地二十七頃四畝有零
租市錢二千五百一十千文又銀三兩穀三百餘
石甚屬不合查屯莊地畝給與無業旗人耕種輸
租原為旗人立經久之業自應力勤耕作永安生
計乃不肖屯戶等擅將所種額地私立坐租之名
違例長租實與私典無異若非嚴行懲創無以儆
戒將來應如該督所議將長租地二十七頃四畝

有零全行撤出召種輸租其各屯長屯戶得過長
租錢文銀兩穀石并令勒限追出入官屯長納寧
屯戶張桂民人劉金忠等均應照律分別治罪但
事犯在乾隆十四年四月初九日

恩詔以前應予援免

又議屯長額種地畝之外復有認種空地畝因
屯戶退出地畝有違欠者據屯長呈明代種帶銷
其無違欠者亦准認種交租前督臣高斌酌議令

屯長代種既可以帶銷舊欠又可以裕其生計詎意不肖屯長因認種地多遂爾長租私典以致積欠累累今既徹底查清自應將屯長認種地畝概行撤出召民承種輸租

又議節年舊欠科則穀及代種帶銷穀又節年舊欠帶完銀及舊欠認種空地租銀均應酌定年限帶徵查屯戶所種額地僅交科穀舊欠尚少其撒剩地畝歲獲租糧儘可帶銷應將所欠科穀無

分多寡均以三年帶完至屯長認種額地及空地畝魚交銀穀節年積欠較多存剩地畝及所食錢糧不敷坐扣應再行查核如為數不多三五年內可以帶完者銀則於錢糧內按季坐扣穀則於所種地內分年帶交倘所欠銀穀過多約計年限不能帶完者即將該屯長革退嚴行治罪至防守尉有管轄之責既徇情任其貪多攬種其私行立約長租又毫無覺察以致連年積欠無完應即着

落防守尉名下賠補如既定分年之後復不按限清完以致逃亡拖欠者應將未完之項亦着落經催不力之防守尉按數賠補

又議未完借領捐備穀二千餘石及借米八十三石各屯戶前欠未清續借自宜撙節乃並不計及該戶能完與否遽行申部請借移交地方官放給竟致一人名下拖欠多至數十餘石其徇庇濫借咎實難辭據該督聲明乾隆九年

恩詔所有借出籽種口糧等項查明實在無力完繳者
准予豁免今前項未完原借米麥穀石是否實係無
力完繳應令該督詳細查明取結具題其餘未完
原借捐備穀石應如該督所請均分作三年帶完
如限滿不能催完即着落防守尉名下賠補

又議此項屯糧向係地方官經徵按年彙入另案
奏銷防守尉雖有管轄之名並無協催之實查屯
戶以防守尉為專管民人以州縣為專管理事廳

則旗民統轄應將屯戶額徵科穀責令防守尉經徵其退出召民承種地畝應令地方官經徵統以各理事廳為督催每年另冊奏報如有未完與地糧一例處分

又議理事同知既有分任督催之責如有關屯戶錢糧地畝事件理應分同稽查該防守尉不得徑行申部并令嗣後防守尉一面徑移道司核詳咨部一面移明理事廳查核轉報

又議旗人地畝久經嚴禁不許私行典賣今固安霸州等處屯長擅將所種旗地私立坐租之名租與民人耕種實與私典無異該防守尉等漫無覺察殊屬不合應將原任固安縣防守尉海明原任霸州防守尉孫塔均應照例各罰俸一年事在恩詔以前應予寬免奉

旨依議

以上屯戶規制

欽定八旗通志卷六十七

欽定四庫全書

欽定八旗通志卷六十八

土田志七

土田數目

內府莊園數目 宗室莊屯數目 八旗給地總數 直隸各處八旗地畝數

目 奉天各處八旗地畝數 採捕山場 臺站地畝 附升田數目

內府莊園數目

順治初

定鼎燕京近畿百姓帶地來投願充納銀莊頭者各按其

地畝為納銀莊頭後有願領入官地畝設莊納銀亦為納銀莊頭帶地來充者為投充人單身投充願領地納銀者每人給一繩地

四十二畝為一繩

為繩地

人納蜜納葦納棉納靛者為蜜戶葦戶棉靛戶坐落順天永平天津保定宣化所屬州縣及喜峰口古北口外等處

鑲黃旗四十四莊帶地投充人及繩地人共投一百五十八名蜜戶八名葦戶六名共地二千三百六

十八頃有奇後定為大莊一百五十九所半莊五十九所園三十二所共地四千三百八十六頃

正黃旗四十七莊帶地充投人及繩地人共六十三名密戶十有八名葦戶一名共地一千三百九十九頃有奇後定為大莊一百四十六所半莊五十四所園二十九所共地四千一百二十三頃

正白旗四十一莊帶地充人九十三名密戶十有二名共地一千九百八十八頃有奇後定為大

莊一百五十三所半莊五十八所園三十九所共
地四千二百七十九頃

帶地投充人各帶地畝多寡不一計地三千三百
頃九十八畝零繩地人計地三百五十二頃四十
五畝均每畝徵銀三分草一束

密戶計地二百八十九頃六十三畝零每六畝徵

密五斤交納官三倉

雍正六年准密戶所交密除
官三倉呈明足用外其餘每

畝折銀五分
交廣儲司庫

葦戶計地一百四十九頃八十二畝零按地肥瘠每畝徵銀一分至八分不等除每年額徵蘆葦四萬餘斤抵折銀兩外其額徵銀五十二兩零交廣儲司

棉靛戶共地三十四頃七十二畝每棉丁徵棉花

五十斤靛丁徵水錠百斤交廣儲司

乾隆五年議棉靛戶之地

畝頗薄不堪種棉種靛准照投充人之例每畝徵銀三分草一束銀交廣儲司草交會計司

又菜園瓜園順治初年定每內管領下菜園頭二

名水園頭一名輪班交納菜蔬瓜實後立菜庫

在康熙三

年十三定菜園頭為六十名每名給畦地一頃八十

畝無畦地則每畝折給旱地五畝

每名旱地九頃除

暢春園奉宸苑種菜各用園頭一名外其餘五十八

名隨時交納鮮菜

按菜園頭六十名中二十五名係畦地三十五名係旱地乾隆

四年奏准畦地照舊供菜旱地折銀交廣儲司

安肅園頭四名專納白菜

瓜園頭三十名

給地與菜園頭同

歲納瓜茄諸蔬又承種

雲南西瓜園頭二名各交西瓜一百投充西瓜園

頭四名各交西瓜一千

又菓園順治初年定順天保定河間永平等府屬
設菓園一百三十六所共陳丁七百有五給養贍
家口地二百七十一頃二十畝零每丁歲徵銀三兩
盛京陳園丁三百五十有一廣寧陳園丁一百十有
七每丁歲徵銀三兩近畿新園一百二十一所
携地來投共八百七十頃四十七畝零每畝徵銀
五分嗣於南苑設菓園五所在康熙十二年各給地一
頃十有九畝外各給養贍家口地二頃十畝歲納

各種桃李不徵地畝錢糧尋又以新陳各園頭等
子孫繁衍將入官地畝增設新園二十六所各給
地五頃計地一百三十頃每歲按畝徵銀一錢如

遇水旱一例豁免

在雍正二年又

盛京增新丁八十四名每丁徵銀三錢六分廣寧增
新丁三名每名徵銀四錢二分共徵銀三十一兩
有奇

又營造司設灰軍煤軍炭軍各以地三十五畝編

為一丁其草子匠各以地四十二畝編為一丁灰
軍及草子匠共地一百八十九頃二十一畝每七
畝徵銀二錢一分草七束銀交廣儲司草交會計
司煤軍及草子匠共地一百八十八頃五十一畝
炭軍地一百八十四頃八十畝徵銀皆與
灰軍同每地六
畝交草七束以上各設千總二人把總四人外郎
四人即於三項軍丁內選補每人各給地三十五畝
免其賦

又長夫三旗佐領下人每地三十畝為一丁每十二丁編長夫一名內管領下亦三十畝為一丁每八丁編長夫一名每夫每月納銀二錢一分零三旗共編長夫二百五十八名每月納銀五十六兩零運送物件即動用此銀僱夫

又園戶匠役

景山瀛臺靜明園南花園每名給養贍家口地六十畝其餘各園給地三十畝功德寺園頭一名花匠

二名種花地二十畝豐臺園頭一名花匠二名種
花地六十畝將容城房山等縣取租地二十頃分
給二處園頭備辦正陽門外三里河金魚池投充
園頭一名長工二名每名給地六十畝有闕以其
子弟充補

又

南苑苑戶每名給地二十八畝湯山苑戶每名給地
三十畝南苑海戶每名給地二十八畝凡南苑海

戶二千二百名後裁去千戶二名總甲十名小甲四十名門軍四十五名海戶五百零三名原給之地悉行撤回總甲每名增地三十二畝小甲及巡青海戶每名增地十二畝尚餘地八十八頃八十八畝仍為羊草地其牆外馬道及通州等處退出地七十四頃交與戶部令州縣徵收錢糧

又沙河糧匠司匠內頭目二十名各給官地一畝二分其餘匠役各給官地一畝均令新舊交代相承

為業

順治十八年奏准將帶地投充新丁分為三旗共計一千三百七十丁現今實在一千二百二十七丁每丁有地自三十畝至四十二頃不等其地一千七百七十二頃二十四畝零內有水田二百四十一畝零每水田六畝徵銀一兩五分旱地六畝徵銀三錢五分再籍沒入官無地牲丁三名各徵丁銀二兩每年共徵銀八千八百八十五兩零均

催交廣儲司內有納牲者按則折銀准抵正賦有
被水者俟報到具奏停其徵收有衝壞溝渠不能
耕種水田尚可改種旱地者停其水田之賦照旱
地徵收衝成溝渠不能耕種者將應徵之賦暫停
徵收均於每年秋收後委官察驗

稻田莊共水田二十五頃十有五畝旱地二頃八
十八畝坐落涿州房山玉田等州縣

豆糧六莊計地四百九十二頃八十六畝坐落武

清縣

康熙八年題准將各莊編為一二三四等每十年編一次

九年奏准於附近莊頭內選四人於

南苑安設四莊每莊給地十有八頃

十二年奏准

南苑增置莊一所

又奏准房山縣設稻田莊一所計水田二頃八十

四畝玉田縣設稻田莊一所計水田六頃六十畝
旱地一頃二十畝

又奏淮安設瓜園菜園除額給地外並予養家口地
一百二十畝牛四頭蒲簾一百二十五株稻三千
五百束均免差一年

二十一年奏准涿州設稻田莊一所計水田七頃
八十畝旱地一頃六十八畝

又議准

盛京糧莊所納糧米給與三旗人丁口糧外餘於該莊作窖收貯

二十三年奏准山海關外莊頭每十年委本司官前往編定等次

又奏准

暢春園內餘地及西廠二處種稻田一頃六畝令附近之莊頭壯丁每年輪種給與石景山等處地十有一頃三十四畝四分以為耕種稻田之資

二十四年設立糧莊每莊給地十有八頃舊例每
莊壯丁十名選一人為莊頭給田一百三十晌場
園馬館另給田四晌壯丁蕃衍則留于本莊缺則
補足給牛八頭量給房屋田種口糧器皿免第一
年錢糧至是設糧莊每莊地三百晌其頭等二等
莊頭不准給牛又山海關內古北口喜峰口外糧
莊每一所納糧百石

此名斤石每石合倉石三石
六斗每百石合倉石三百六

十
石山海關外糧莊每一所納糧百二十石

合倉石
四百三

十二
石

二十五年定莊田報災之例凡莊田報災定例於
七月二十日以前莊頭呈報會計司委員察勘於
定額內酌量豁免至是題准莊頭報災勘災得餘
剩好地六十五晌以下者給與養贍家口六十五
晌以上者照舊當差

二十六年題准於納銀二百之莊頭內改立糧莊
增壯丁為十五名

三十年奏准各莊頭收存之糧核明實數或十莊或五莊收聚一處擇殷實之莊作窖收貯

三十四年奏准歸化城安設

皇莊十有三所各給地十有八頃於各莊頭子弟及殷實壯丁內選充莊頭每莊歲徵米二百石由歸化城都統徵收貯本處旗倉

四十五年奏准捕牲烏喇地方於密戶內簡選五人安設

皇莊五所每莊定壯丁十四名給以牛具令其開墾
四十八年令莊頭地畝不足額者准其補給薄餼
沙壓者准其換給

五十年定糧莊納糧之數山海關內古北口喜峰
口外頭等莊報倉石二百五十石二等莊三等莊遞
減三十石末等莊報一百二十石每石折小米五
斗

五十一年定山海關外頭等莊報倉石三百二十

二石二等莊三等莊通減三十石末等莊報一百九十二石

又定領種入官地畝莊頭四名每名報糧七十石帶地納糧莊頭一名報糧六十四石

又奏准豐臺安設菜園十有一所除給地外並予鑿井六口牛四頭房三間

五十五年定給莊頭頂帶之例莊頭內當差四五十年不欠錢糧者給八品頂帶二三十年無欠及

年老不能當差者均給九品頂帶

舊例賞罰於額外多納一石者

賞銀四錢多者賞馬匹端單缺額一石者責二鞭鞭不過百後此例皆停

又奏准

盛京莊頭每十年委本司官前往編定等次

五十七年奏准各州縣莊頭子弟內簡選十五人

於駐馬口外彌陀山等處安設

皇莊十有五所各給荒地十有八頃令其墾種

六十年議准涿州入官稻田三頃令附近莊頭承

種

雍正元年

諭山海關內莊頭等所欠陳糧俱令豁免所欠新糧限三年內交完尋內務府議定一二年內全完者賞給品級及加級有差三年不完者罪之

又奏准山海關外莊頭等次改令錦州副都統編審造冊送府停止司官前往

二年定莊田勘災例以被災地畝編作十分按分

數免差仍計口給糧有捏報者罪之

三年令口內莊頭交倉所餘之糧折銀交廣儲司
口外莊頭糧米運交熱河倉其稞糧秫稻等項亦
折銀交廣儲司

又奏准山海關外一等莊給地五十四頃二等五
十一頃三等四十五頃四等三十九頃如有不足
額者將各莊餘地補給其餘地畝令地方官召民
耕種輸租戶部

又奏准功德寺水田七頃四十四畝甕山水田八
頃十一畝所得稻已敷一年之用留此二處官種
外其六郎莊等處應租與附近居民計六郎莊水
田五頃四十八畝旱地三頃七十五畝北塢水田
九頃三十七畝旱地一頃八十八畝蠻子營水田
十頃旱地一頃二十五畝黑龍潭水田五頃三十
一畝旱地五十四畝石景山水田四頃八十二畝
功德寺頭園水田一頃三十五畝旱地一頃八十

七畝甕山旱地一頃一畝六郎莊房基地十五畝
荷花池四畝功德寺房基地九畝荷花池十二畝
各有奇洩水河荷花池一區甕山荷花池一區並
分別徵租有差

六年奏准將豆稻七十二莊均改為半莊并入現
有半莊共計半莊一百七十有一

又議准向來各莊但有居住村名地畝數目未載
四至今內務府司官會同戶部及地方官逐一丈

量各造四至清冊三本分貯內務府戶部直隸總督衙門以備察覈

又奏准駐馬口外彌陀山等處十有五莊每莊歲納米二百倉石由右衛將軍徵收貯該處旗倉

七年議准丈量口外莊頭等原額地畝並自墾地畝甚屬過多且不畫一將現在頭庄各給地三十九頃所餘之地共二千九十頃五十二畝按每莊三十九頃之數於莊頭子弟及誠實壯丁內選五

十三人增設莊五十三所

又奏准將房山縣入官稻田七頃九十五畝增設莊一所

又奏准關內三百二十二莊內定為一等五十七莊二等十有六莊三等三十八莊四等二百十有一莊口外一百三十八莊均定為一等

十三年定承催官獎勸例六年全完者加一級三

年全完者紀錄

按承催官于乾隆元年停止至四年復設

又奏准各等莊頭四等升為三等三等升為二等
二等升為一等原有頂帶者各加一級無頂帶者
以次賞給九品從八品正八品頂帶初次降等有
頂帶者褫革無頂帶者鞭八十二次鞭一百三次
鞭一百革退莊頭

乾隆元年奉

旨盛京編審莊頭等次著內務府司官會該管官辦理
二年奏准歸化城十有三莊墾地二千六百餘頃

每莊各給六十頃外尚餘地一千九百餘頃交地方官募民耕種輸租戶部

四年奏准菜園瓜園地亦照莊地丈量四至造冊存案

又奏准凡投充人等所帶地畝如有薄醺沙壓者委官勘實准其退出暫交地方官召民耕種輸租戶部其附近處有可補之地照數補給如無可補之地即按其現有地畝交差

八年奏准自康熙二十三年編審等第以來凡地畝寬裕者皆已陸續升等加差若仍照例編等必至有名無寔應停止十年編等之例

九年議准德勝門外向有荷花池一區每年僅徵銀四十五兩今勘得內有稻田九十四畝旱地三畝荷花池七十六畝蒲池五十四畝共應徵銀八十兩有奇歲入奏銷又德勝門內銀錠橋西所有稻田三頃向屬本苑管理後因地勢高窪不等難

以耕種所有房屋交房租庫管理年來挑挖河道疏
濬順利業經栽種荷花已成荷池除房租仍聽房租
庫收租外所有荷池地畝應仍歸苑管理以昭畫一
又覆准燕郊及白澗桃花寺隆福寺四處

行宮各置千總一人兵八名應得俸銀俸米除燕郊一處仍
於本佐領闕支外其白澗等三處官弁俸銀於佐領下闕
支俸米則各於附近撥地九十畝給抵其四處兵丁每兵
月餉五錢外亦各於附近給地六十畝以抵月糧

十年覆准燕郊白澗桃花寺隆福寺盤山髻髻山

蟠龍山

今大興莊

三家店八處看守

行宮之千總畫一每人歲給俸銀六十兩又撥給官地九十畝所有馬乾俸米一併裁汰此八處兵丁各給官地六十畝每月給餉銀一兩

又奏准

國初以來附近耕種地畝自二三十頃至四五十頃不等嗣後此等地畝如莊頭係子孫兄弟及族人

承種者不必議減外其欠糧或緣罪革退及絕戶以異姓承種者均以十八頃為一分九頃為半分餘地足十八頃九頃者增設大莊半莊奇零不足數者交地方官召民耕種輸租戶部

十一年議奏石槽懷柔密雲瑤亭四處

行宮照燕郊等處之例各設千總一人照例給地九十畝歲給俸銀六十兩至於兵丁除盤山十二名燕郊等皆八名瑤亭六名均毋庸議外惟懷柔羅

家橋現兵各五名應各增一名密雲現兵六名應增二名照例給予地畝月餉奉

旨羅家橋懷柔縣行宮不必增設兵丁將所議增設之二名增與瑤亭行宮

又奏准專設

暢春園西廠莊頭除舊給石景山地十有一頃三十畝四分外將附近州縣入官地增給六頃六十五畝六分以足十八頃之額

十二年覆准口外

行宮千總歲支俸銀及撥給官地尚與口內千總不甚相殊而委署千總每名給地九十畝月支餉銀五錢兵丁每名給地六十畝而月支餉銀或多或少或有或無參差不一今酌定千總每月餉均增為一兩兵丁均增為五錢至巴克什營一處千總應改隸熱河總管照例給地九十畝歲俸六十兩以昭畫一

十三年議准

瀛臺麥田每年委附近莊頭一人辦理

又奏准宣化府不足之莊地十有八所除應納錢糧只按現在畝數徵收外嗣後有報水衝沙壓者內府官會同地方官勘寔召民承種輸租戶部

十七年議准司屬東安武清之雀戶被水淹沒地四十九頃有奇自乾隆六年以來均由司委官前往會同地方官察看惟有乾隆十年勘出水涸淤

地六十六畝有奇業已升科餘年並未察出徒滋
紛擾嗣後停止委官交戶部轉咨直督於每歲秋
成後飭地方官勘明報府再宛平縣尚安邱雀戶
水田被水衝壞溝渠水淹成溝難以耕種田九十
五畝堪種旱地二十四畝歲委催長一名察勘以
杜隱匿

三十五年定莊頭承種額撥官地不准藉稱薄鹵
沙壓退交兌換其有誤差不能承充莊頭者內務

府大臣查勘確寔另派莊頭承種

四十七年奏准內務府所屬莊園人等承種官地如遇旱澇災歉俱照民地之例一分至四分者不准報災其分給口糧之處緊行停止

以上內府莊園數目

宗室莊屯數目

謹奏

國初諸王勲戚及八旗臣工俸糈之外既

賜園地復按所屬壯丁撥給晌畝遇有旱澇隨時賜賑至澆矣故前卷既載規制茲復以累年給予數

目開具
於後

鑲黃旗宗室整莊四所半莊一所園一所共地六
百一十晌坐落大興通州武清平谷河間各州縣
正黃旗宗室整莊五所半莊十二所莊四所園三
所共地一千七百七十六晌坐落大興宛平三河
寶坻順義涿州房山保定雄縣易州任邱各州縣
正白旗宗室整莊四所莊一所園二所共地六百
晌坐落順天香河通州寶坻房山及沙河所等處

正紅旗宗室整莊一百四十五所半莊三所整園
五十所半園十所園四所共地二萬七百三十六
晌零坐落順天宛平昌平涿州文安保定定興涿
水及遼陽海城蓋平各州縣

鑲白旗宗室整莊一百七十八所半莊五所莊八
所整園八所園二十所果地靛地網戶獵戶等地
七十六處共地二萬八千六百一十九晌零坐落
大興宛平良鄉固安永清東安香河通州三河武

清寶坻昌平密雲懷柔房山霸州薊州玉田平谷
遵化豐潤遷安灤州樂亭保定易州河間任邱滄
州保安及遼陽海城蓋平鐵嶺山海關外等處
鑲紅旗宗室整莊二百九十八所半莊二十三所
莊五所整園一百十一所半園二所共地四萬三
千八百三十五晌坐落大興宛平永清香河通州
寶坻昌平涿州房山霸州灤州新城河間肅寧滄
州延慶及張家口外等處

正藍旗宗室整莊五百四十四所半莊一百五十
一所莊二十二所整園一百三所半園十九所園
七十三所果菜牧地五處共地八萬八千五百五
十四晌零坐落大興宛平良鄉永清東安香河通
州武清昌平順義懷柔涿州房山霸州保定薊州
玉田平谷遵化豐潤永平昌黎灤州樂亭新城易
川青縣無極保安及承德遼陽開原錦州寧遠廣
寧開平冷口外等處

鑲藍旗宗室整莊二百三十一所半莊六十三所
莊九所整園一百二所半園二所園三所共地三
萬七千五百七十九晌零坐落大興宛平固安永
清東安昌平懷柔灤州蠡縣安州高陽及遼陽海
城蓋平錦州開平等處

以上宗室莊屯數目

欽定八旗通志卷六十八